


南宋古蹟考





南宋古蹟考

朱彭輯

編主五雲王

編初成集書叢

考蹟古宋南

中華民國二十四年十二月初版

輯者 朱 彭

發行人 王 雲 五  
上海河南路

印刷所 商 務 印 書 館  
上海河南路

發行所 商 務 印 書 館  
上海及各埠

●〇六二二二

朱

本館據指海本排  
印初編各叢書僅  
有此本

# 南宋古蹟考卷上

錢唐 朱彭 輯

## 城郭考

宋史高宗本紀建炎三年升杭州爲臨安府。紹興八年定都。心史云。宋行在十三門。咸淳志紹興二年霖雨城壞。二十八年增築內城及東南之外城。附于舊城。凡十三門。東曰便門。候潮。保安。新門。崇新。東青。艮山西曰錢湖。清波。豐豫。錢唐。南曰嘉會。北曰餘杭。水門五。曰保安。曰南水。曰北水。曰天宗。曰餘杭。元張翥蛻菴集有臨安故城圖詩。

## 城郭考總敘後當有外城門名目

便門 在東。紹興二十八年增築。又設西華。東便二門。游覽志候潮門在東而近南。宋時有便門。保安門。今廢。夢梁錄云。沿寨向南有便門。謂之東便門。萬歷杭州府志。候潮門外東爲期清坊。舊便門街。又云。宋瓦舍有便門瓦。

候潮門 在東方。輿勝覽云。紹興三十八年。殿前都指使楊存中。乞通展皇城十三丈。以五丈作御路。六丈作民居。將來聖駕親郊。由候潮門徑從所展御路。直抵郊臺門外。欄木橋。夫差廟諸跡。錢唐遺事。高宗嘗宴大臣。忽見張循王有玉孩兒扇墜。上識是墜十年前往四明誤墮于水。屢尋不獲。乃詢張復遣根問。云于候潮門外陳宅廚娘買得。廚娘因破黃花魚得之。奏聞。上大悅。以爲失物復還之兆。

保安門 在東俗名小堰門。考通江橋本名慶元橋。北爲太醫局。又東爲保安門。

新門 在東俗呼草橋。都城紀勝云。城東新開門外有富景園。五柳園。癸辛雜志云。東都盛時。無賴男子以色圖衣食。吳俗此風尤甚。新門外乃其巢穴。皆傅粉盛粧飾。善針指。呼謂亦如婦人。其爲首者號師巫行頭。

崇新門 在東俗稱薦橋門。今名清泰。當時門內有崇新橋。崇新巷。皆以城得名。夢梁錄云。仲春十五日爲花朝節。崇新門外長明寺建佛涅槃勝會。觀者紛集。竟日不絕。葦杭紀談。紹興中。臨安府崇新門鹿苑寺。乃殿帥楊存中特建。以處此地流寓僧人。一歲元宵。側近營婦連夜入寺觀燈。有殿司將官妻同一女觀燈。爲寺僧引入宿于幽室。事覺。毀其寺。西湖志餘。宋時楊德溫居崇新門外。插枯竹以引薜荔。月餘枯竹復生。未幾其妾溺水死。明年竹園忽發兩岐。扶疎可愛。未幾其妹死。乃知反常之物。非吉兆也。夷堅志云。臨安薦橋門外米市橋之傍有賣琪豆者。腰間生尾長四尺餘。每用纏縛數匝乃得出。常爲市中小兒窘迫。必求觀乃止。

東青門 在東俗呼菜市門。在菜市橋東。今東青巷。卽城之舊址也。游覽志。門之左。宋有皇城司。營武安泉水甚佳。

指南錄序。皋亭山距脩門三十里。按脩門卽今艮山門也。

艮山門 在東。今俗呼壩子門。咸淳臨安志云。走馬塘在艮山。菜市門外平坦可馳馬故名。舊有花柳號。

城東新路

錢湖門 在西今塞。萬歷錢塘志云。在清波門南。內傍雲居山。門北有海子口。出城內諸山水。西湖游覽志。門之內有牙兵寨。虎翼營。教驤營。騏驎營。白鱗井。夷堅志。步司將狄訓練。五更至錢湖門。覺有物觸足。取視則一巨蟹。長三尺。形模怪醜。執送於家。坐假寐。夢一人綠袍軟幘。持手板揖曰。某乃西湖判官。清波門 在西。門外有流福水橋。咸淳四年建。以引湖水入城。亦稱暗門。故書院劉松年居此。人稱暗門。劉陸游夜泛西湖云。騎馬出關門。指此周必大二老堂。雜志云。壬午三日己亥。晴。與芮國器。程泰之。蔣子禮。出關門。上風篁嶺。高翥春日湖上詩。又有清波門外放船時句。泊宅編。建炎己酉。橈。杭州清波門裏竹園山。平地湧血。須臾成池。腥聞數里。明年金人殺戮萬人。卽暗門竹園山也。

竹園山 臨安志云。在府治西南。吳山一脈。獨趨而北。隱隱隆起。陰陽家目爲治所主山。安撫趙與簾建閣其上。平鑑西湖。理宗御書竹山閣。後撫魏克愚徙其閣。而山漸弛爲平地。

陸游夜泛西湖示桑甥世昌 嗟我客上都。忽已見暮春。騎馬出暗門。眯眼吹紅塵。西湖爲賈區。山僧多市人。誰令汚泉名。只合加冠巾。黃冠更可憎。狀與屠沽鄰。麝酒肉氣。吾輩何由親。少頃一閒散。境寂鷗自馴。舉手邀素月。移舟來青萍。鐘從南屏來。殷殷浮烟津。鶴髮隱者歟。長樂取釣緝。畏冷不覺夕。恨此老病身。明發復擾擾。吾詩其絕麟。

高翥春日湖上 清波門外放船時。盡日輕寒戀客衣。花下笑聲人共語。柳邊橋影燕初飛。曉風不定棠

梨瘦夜雨相連薺麥肥。最憶故山春更好。夜來先遣夢魂歸。

僧揮寶月山作調寄訴衷情 清波門外擁輕衣。楊花相送飛西湖。又還春晚。水樹亂鶯啼。閉院宇。小

簾幃。晚初歸。鐘聲已遠。篆香纔點。月到門時。

仲殊

豐豫門 在西。亦名湧金。北宋名湧金。紹興築城。改爲豐豫。夢梁錄湧金池在豐豫門內。考資治通鑑。建

炎二年。韓世忠敗苗翊。勤王兵入北關。苗傳劉正彥趨都堂取鐵券。擁精兵二千。夜開湧金門以走蘇

幼安。秋堂墓志云。淳佑八年。柴秋堂望以上丙丁龜鑑下獄。趙京尹疏救之。放歸田里。設祖道湧金門

外者。若鄭震。吳陵。葉元素。朱繼芳等。凡十三人。皆一時名流。俞德鄰次韻趙提舉詩云。湧金門酒甜如

蜜。知常日湧金門酒亦甚著名。乾道臨安志。政和六年。郡守徐鑄以豐豫墮損。命鈴轄楊靖重建。頗極

壯麗。榜曰湧金樓。

施樞湧金門外 柳絲舞困起炊烟。羅綺相催欲上船。貴治亦知春有夜。暖沙還付白鷗眠。

貢性之湧金門外見柳 湧金門外柳垂金。三日不來成綠陰。折取一枝入城去。教人知道已春深。

張孝祥鷓鴣天詞 日日青樓醉夢中。不知樓外已春濃。杏花未濕疎疎雨。楊柳初搖短短風。扶畫鷁。

躍花驄。湧金門外小樓東。行行又入聲歌裏。人在珠簾第幾重。

錢塘門 在西。紹興二十八年增築。杭城西四門曰錢湖。清波。豐豫。錢塘。此錢塘名門之始。宋史歐陽守

道以言罷。徒步出錢塘門。惟書兩篋而已。

王同祖湖上早行 錢塘門外買湖船。霧氣衝雲水接天。只有蘇堤金線柳。半籠斜日半籠煙。

嘉會門 在南通江路大街。後代猶存嘉會弔橋。游覽志云。馬倉巷北卽宋嘉會門。按宋紹興增築城外。名南門曰嘉會。時南門包絡宮門。最爲長展。西際慈雲嶺。東沿包山。其門偏在包山之下。夢梁錄云。嘉會城樓綢綵爲諸門冠。蓋此門爲御道。遇南郊。五輅從此幸郊臺。

陸游四鼓出嘉會門赴南郊齋宮 客游梁益半吾生。不死還能見太平。初喜夢魂歸帝所。更驚老眼看都城。九重宮闕晨霜冷。十里樓臺落月明。自笑蒼顏君勿笑。少年慣聽舜韶聲。

餘杭門 在北。成化杭州府志。杭城舊有十三門。惟餘杭門在北。不得出居人之權。亦名北關。岳珂有望北關門詩。宋史苗傅傳。苗翊馬柔吉以兵阻河。韓世忠率先鋒力戰。後與光世乘之。翊敗走。勤王兵入關。

王銍繫舟餘杭門訪西湖金輪寺參上人 北郭望西湖。微徑幾尋尺。淡與人意長。寒雲正無色。深尋幽禪居。步轉蒼山側。落葉不可記。遮盡山下石。師方無定居。我亦何以適。四海莽無歸。老矣山中客。百年熟機緣。還此共禪寂。語罷古今分。座上有陳迹。一笑視此生。何事非戲劇。開門納遙峯。暮雨一江白。茲遊非世逢。歸路晚蕭瑟。積陰迷曉昏。鐘聲報將夕。

姜夔出北關 吳兒臨水宅。四面見行舟。蒲葉浸鵝項。楊枝蘸馬頭。年年人去國。夜夜月當樓。傳語城中客。功名半是愁。

葉紹翁出北關一里詩 脫衣命僕洗塵埃。離落人家未見梅。出得城門能幾步。船頭便有白鷗來。

張輯乙未之秋高郵朱史君錢唐北關舟中調寄祝英臺近 客西湖聽夜雨。更向別離處。小小橋窗。香

雪照樽俎。斷腸一曲。秋風行雲不語。總寫入征鴻無數。認眉嫵。喚醒岩壑風流。丹沙有奇趣。羨煞秦

郎。淮海漫千古。要看作自作新詞。雙鴛飛舞。趁月底重修簫譜。

保安水門 在東。夢梁錄云。保安水門河通跨浦橋。與江相隔。游覽志茅山河入保安水門。過保安橋。過

軍橋折而北合流通江橋。

南水門

北水門

天宗水門 成化杭州府志。舊又有天宗門。俗呼爲小北門。余考水門卽在此地。萬曆府志。上堰在天宗

門外。咸淳志。南自天宗水門。餘杭水門。二河合於北郭稅務前。仁和縣志。天宗棧庫在天宗水門內。

餘杭水門 都城紀勝云。北關水門內有水數十里。曰白洋湖。

考元時禁天下修城。以示天下一統。內外城隍日爲居民所平。至正十六年。張士誠據有浙西。十九年

發松江。嘉興。湖州。杭州民夫復築焉。以舊城包山距河。故南北長峙。則自艮山門至清泰門以東。視舊

則拓開三里。而絡市河于內。自候潮以西。則縮入二里。南截鳳山門于外。故東西比舊差廣。東無便門。

保安二門。北增天宗。北新二門。口仍十有三。而南宋之城址。已不無更易矣。夢梁錄云。諸門內便門。東

青艮山皆甕城。水門俱平屋。其餘旱門皆造樓閣。諸城壁各高三丈餘。橫闊丈餘。禁約嚴切。人不敢登。二老堂雜志。臨安土人諺云。東門菜。西門水。南門柴。北門米。蓋東門絕無居民。彌望菜圃。西門則引水注城中。以水舟散給坊市。嚴州。富州。富陽之柴。聚于江干。由南山入蘇湖。米則來自北關云。

### 內城門

南麗正門 咸淳臨安志云。紹興二年九月南門成。詔名曰行宮之門。三年詔梁汝嘉創廊廡於南門之內。鼠璞云。行在南內門名麗正。蓋取重離麗正之義。夢梁錄云。大內正門曰麗正。其門有三。皆金釘朱戶。畫棟雕甍。覆以銅瓦。鑄鏤龍鳳飛驤之狀。巍峨壯麗。光耀溢目。左右列百官侍班閣子。登聞鼓院檢院相對。悉皆紅杈子。排列森然。門禁嚴甚。武林舊事。冬至或元旦有事南郊。自嘉會門至麗正門計九里。三百二十步。皆潮沙填築。其平如席。以便五輅往來。肆赦日。自文德殿詣麗正門御樓。夢梁錄云。駕詣景靈宮有大旗。名蓋天旗。立於麗正門外。咸淳志云。門外卽儀鸞司營。考雲麓漫鈔。麗正門以鳳凰山作案。山盡處卽嘉會門。則知此門正對鳳凰山。其址至今可意度也。

北和寧門 在鳳凰山左。游覽志。般若寺卽和寧門遺址。夢梁錄云。內後門名和寧。在仁孝登平坊巷之中。亦列三門。金碧輝映。與麗正同。把守衛士嚴禁。如人出入。守闌人高唱頭帽號。門外列百僚侍班閣子。左右排紅杈子。左設開門。右立百官待漏院。古杭夢游錄。自大內和寧門新路。南北寶玉。珍異及花果。時新海鮮。野味奇品。悉集于此。公主下降日。駙馬至和寧門易冕服。又云。院子。小園子等人。祇直和

寧門外紅杈子。早市買賣。市井最甚。夷堅志。臨安內北門外西邊小巷民孫三者居之。每旦攜熟肉出。常戒其妻曰。照管貓兒。一日忽曳索出。到門。妻急抱回。見者皆駭。貓乾紅深。色無不羨嘆。浸達內侍之耳。竟以錢三百千取之。內侍欲調馴。安帖乃進。已而色澤漸淡。及半月。全成白貓。走訪孫氏。已徙居矣。楊萬里初夏清曉。赴東宮講堂。經和寧門外賞花市詩。剩雨殘風一向顛。花枝酒盞兩無緣。忽逢野老從湖上。擔取名園到內前。芍藥截留春去路。鹿蔥交上夏初天。衆紅半霎聊經眼。不枉皇州住二年。

東華門。夢梁錄。入登平坊沿內城有內門曰東華。守禁尤嚴。內城向南。皆殿司中軍將卒立寨。名中軍聖下寨。門外俱有護龍水池。又云。士人赴殿試。入東華門。各行搜檢。方行放入。武林舊事。公主下降。先擇日。宣召駙馬至東華門。引見便殿。及吉期。又至東華門用膺幣。

考登平坊。舊在清平山巷。對清平山。卽今高士坊巷。斜對六部橋。宋六部二十四司卽在此地。

西華門。據武林舊事。增入咸淳臨安志所載。惟有南北東三門。

考咸淳臨安志。紹興十八年。名南門麗正。北曰和寧。東苑門曰東華。二十八年。增築皇城。其城周迴九里。玉海云。紹興二年。南門成名曰行宮門。十八年。築皇城東南之外城。五百四十一丈。更名西南門曰嘉會門。文獻通考。高宗詔百官。特許乘轎。惟不入皇城。

王同祖夜步內門詩。靜夜高燈人未眠。等閒行過內門前。一聲唱徹連珠曙。碧月朱欄綠柳邊。

宮殿考

宋史地理志。建炎三年閏八月。高宗如臨安。以州治爲行宮。揮麈餘話云。車駕初至臨安。霖雨不止。葉夢得言。州治屋宇不多。六宮居必隘窄。上曰。亦不覺窄。但卑濕耳。然自過江。百官六軍皆失所。朕何敢求安。行在所錄。紹興元年十一月。詔守臣措置修內司。乞造三百間。詔減二百。余考藝祖宮中止用赤白爲飾。仁宗命欄楯撤去朱綠之采。建炎間。高宗至杭。命內臣楊公弼。徐康國。卽行宮。務使簡約。去華飾。遵祖制也。乾道臨安志云。紹興七年二月。降詔巡幸建康府。紹興八年三月。移蹕臨安。下詔曰。昔在光武之興。雖定都于洛。而車駕往返見于前史者。非一。用能奮揚英威。遍行天討。上繼隆漢。朕甚慕之。朕荷祖宗之休。克紹大統。夙夜危懼。不常厥居。比者巡幸建康。撫綏淮甸。旣已申固邊圉。獎率六軍。是故復還臨安。內修政事。繕治甲兵。以定基業。非厭霜露之苦。而圖宮室之安也。故茲詔諭。想宜知悉。按徐一夔行宮考云。今以地度之。南自勝果入路北。則入城環至德。侔天地牌坊。東沿河西至山岡。自平陸至山岡。隨其上下。以爲宮殿。雲巖漫鈔。政和五年。東都築土山于景龍門之側。以象餘杭之鳳凰山。最高一峯。賜名神運昭功。封磐固侯。亦名鳳凰山。後神降有良嶽排空霄之語。以在都城之良方。故曰良嶽。南山成。易名壽嶽。都人且曰萬歲山。所謂餘杭鳳凰山。卽今臨安府麗正門之正面案山。山之盡處。卽嘉會門。山勢自西北來。如龍翔鳳舞。掀騰而下。至鳳凰山止。分左右翼。大內在山之左掖。後有山包之。第二包卽相府。第三包卽太廟。第四包卽執政府。包盡處卽朝天門。端誠殿在山之右掖。後有山包之。第二包卽郊壇。第三包卽易安齋。第四包卽馬院。東南卽大江。西爲西湖。北爲平湖。地險且壯。實

一都會其先兆於東都爲山之時。

外朝正殿考

文德殿 紹興十二年建。行在所錄謂之正衙。六參官起居。百官聽宣布於此。宋史紹興十三年閏四月十七日冊貴妃吳氏爲皇后。前期于文德殿內設東西房。東西閣。夢梁錄。元旦禁中景陽鐘罷。百官皆冠冕朝服。諸州進奏吏各執方物之貢。諸外國正副賀正使隨班入賀。上御正衙。禁衛人高聲嵩呼。聲甚震。爲繞殿雷。百僚俱鞠躬聽宣。制曰。履茲新慶。與卿等同。考行在所錄。凡上壽則曰紫宸殿朝賀。則曰大慶殿。宗祀則曰明堂殿。策士則曰集英殿。四殿皆卽文德殿。隨事揭名。

楊萬里文德殿聽麻仍拜表。蒼龍觀闕啓槐宸。白玉塔除振鷺羣。仗外諸峯獻松雪。霜前一鴈度宮雲。舍人就日宣麻制。丞相瞻天進表文。夙退自欣還自笑。素餐便常策殊勳。

紫宸殿 上壽之所。夢梁錄。宰執親王百官過皇太后殿。上壽起居。舞蹈嵩呼。回詣紫宸殿宴。程史端慶節。上壽紫宸殿。百官皆賜食。余侍班南廊。老兵持二髻牌至。金書其上曰。輒入御廚。流三千里。周必大傳。上始以內禪意諭二府。二月辛酉朔。降傳位詔。翌日上吉服御紫宸殿。又考金國賀正旦使人亦宴於此。

魏了翁紫宸殿詩。珂繖搖心夢不成。忽聽吏早放衙聲。吹燈撥火供晨粥。趁到皇城卻六更。有次鞭鞘陸續鳴。赭袍當殿萬簪纓。羣臣拜舞分行坐。十味肴饈酒五行。蹴鞠尋幢列廣廷。按絲吹竹布前

榮卿郎朵殿渾無見。只聽時時萬歲聲。蛾眉班捲戴花回。遙望君王玉色開。畫楯諸班謝茶酒。尻高首下一聲雷。

劉燭金國賀正旦使人到闕。紫宸殿宴。榆關玉塞靜無塵。嘉定於今第四春。兩國交馳通好使。八方同作太平人。翠鼙鼓奏娛佳客。白獸尊浮賞諫臣。聖歷欲茲天共遠。年年玉帛會楓宸。

大慶殿 朝賀之所。郊前三日。百官奏請。皇帝致齋于大慶殿。南渡典儀云。淳熙十三年。太上八十。正月元日再舉慶典。其日文武百僚集大慶殿。夢梁錄云。麗正門內正衙。卽大慶殿。遇明堂大禮。正朔大朝會。俱御之。又云。元旦朝會。駕坐大慶殿。有介冑長大武士四人。立于殿陛之角。謂之鎮殿將軍。殿西廡皆列法駕。鹵簿儀仗。龍墀立青涼繖十把。效太宗朝。列諸國王班次。如錢武肅。孟蜀王等也。宋史。乾道元年立皇太子。十月十六日。皇帝御大慶殿行冊禮。皇太子服遠遊冠。朱明衣。執桓圭。前期習儀。明堂殿。宗祀之所。紹興四年八月壬寅。知臨安府梁汝嘉奏。明堂行禮。殿成。九月辛酉祀明堂。行宮記作端誠殿。

夢梁錄。太廟在瑞石山。紹興間建。正殿十三室。十三室者。太祖。太宗。真宗。仁宗。英宗。神宗。哲宗。徽宗。欽宗。高宗。孝宗。光宗。寧宗。各一室也。咸淳添置一室。奉理廟神主。通爲十四室。皆正中。蓋終宋之世。未有祧廟也。前人未及有論者。攷中無太廟一條。姑附于此。

任希夷請御明堂齋殿。肇舉明禋預戒期。請臨齋殿御簾帷。廊頭萬旅皆花帽。殿下千官盡絳衣。玉輅

時嚴三歲禮慶霄遙望五雲飛。小臣頭白供籩豆。親見虞廷覽德輝。

王廷珪明堂侍祠詩 唱徹嚴更鳳輪開。侍祠濟濟列崇陔。小臣亦忝廊西獻。惟秉溫恭對越來。玉佩

珊珊出禁扉。金蓮分炬散芳菲。祠班咫尺臨黃道。惹得天香滿袖歸。

集英殿 策士之所。上御集英殿。拆號唱進士名。武林舊事。上御集英殿。唱進士名。狀元賜酒五盞。餘人

各賜泡飯。夢梁錄云。四月初九日。度宗生日。平章宰執親王南班百官入大內起居稱賀。隨班從駕過

皇太后起居畢。回集英殿賜宴。又云。士人殿試前三日。宣押知制誥詳定考試等官。赴學士院鎖院。命

御策題。然後宣約赴殿。士人詣集英殿起居。就殿廡賜坐。引試依圖分廡坐定。各賜印刊策題。

洪咨夔集英策士待宣於內軍器庫廊詩 漢廷興目策英豪。挽釣知誰首掣鰲。百日紅連綸閣迥。萬年

枝拂禁城高。內廊坐永風生席。輦路歸遲月映袍。西抹東塗渾忘卻。一絢短雪不堪搔。

劉燭瑞慶聖節集英殿宴 皇家卜世過周唐。天啓真人應運翔。抱日預占恭邸夢。飛龍曾報皖山祥。翠

雲影外來金母。紅霧香中擁玉皇。樂府賦工無以祝。願將金鑑代珠囊。

垂拱殿 紹興十二年十一月庚子。命內侍王晉錫作崇政垂拱二殿。時言者請復朔日觀朝之禮。而行

宮止一殿。故改作焉。夢梁錄云。垂拱殿常朝四參起居之地。聖節上坐垂拱殿。上壽禮畢。再坐紫宸殿。

宋史淳祐五年二月十二日。進孝宗光宗兩朝御集。寧宗實錄及理宗玉牒日歷。其日皇帝御垂拱殿。

提舉等官奉迎諸書至和寧門。步導至垂拱殿。各取合進呈書匣升殿。陳隨應行宮記。垂拱殿五門十

二架長六丈廣八丈四尺簷屋三門長廣各丈五。宋殿四兩廊各十二間。殿門三間。內龍墀折檻殿後。擁舍七間爲延和殿。按殿址在鳳凰山麓。卽報國寺。又按考古錄云。南自荇箒灣。北至柳翠橋。皆報國寺界。則垂拱殿址可想見矣。

任希夷侍班二首。虎旅分行鐵作撾。殿前拜舞。聲譁。輔臣對罷無公事。日照金鋪扇影斜。閭闔新開露氣清。舉鞭連騎入承明。絲絢同傍瑤墀立。廣殿前瞻御榻橫。

### 內朝後殿

崇政殿。卽祥曦殿。淳熙六年與後殿同建。陳隨應記云。自北宮門循廊而左。巨鑑幕次列如魚貫。轉南爲祥曦殿。宋殿西接修廊爲後殿。武林舊事。后出宮至祥曦殿。上升龍檐出和寧門。至皇后家賜筵。宋史崇政殿說書故左史兼。紹興二年。万俟卨羅汝楫並兼講讀綱目。紹興七年閏二月。以尹焞爲崇政殿說書。乾道二年十一月。幸教場。從駕臣僚自祥曦殿並戎服起居。元史世祖遣伯顏入臨安。宋主昇率文武百僚詣祥曦殿。望闕上表。乞爲藩輔。

魏了翁後殿侍立。須臾陞衛儼成行。禁蹕聲聲輦出房。靴笏趨陪西府拜。卻更絲履立東廊。考宋史新編曰。杭城大內卽州治也。休兵後始作崇政。垂拱二殿。宮室志云。垂拱崇政二殿。雖曰大殿。其修廣僅如大郡之設廳。淳熙再修。止循其舊。宋史地理志云。臨安宮室制度皆從簡省。垂拱大慶文德紫宸祥曦集英六殿。隨事易名。實一殿也。考臨安志。垂拱祥曦係屬別殿。當以親見爲不誣。